

康
對
山
先
生
集

康對山先生集卷之一

賦七篇

夢遊太白山賦

余歷覽載籍所志古人之辭由屈原宋玉以來不可勝計而浮靡侈放之辭益托諷寓興者之所共趨上林之後益蕪益漫亡能爾雅志士之所賤也余感風人之義因夢遊太白山歷見奇瑰駭異之狀孚于人言退而作賦凡若干言雖極假借要皆自喻其迹少有虛謬諛駕凌絕之病示諸同志皆曰可錄

弘治闕逢攝提格終相之月康子夢遊太白與金子

可卿乘馬領僕各執糧糗飲飼之物浮漆跨郿塢
環博物逾武功去約萬里四望塞蔽恐怖蹲突惶惑
震厲若將遂為虎豹之齒有老人者雪鬚鶴髮電目
龍顏自西而來若愛若識請以前路則笑而不言少
頃復去金子曰若非山川之精耶豈將疑我以迷晦
顧我以虛詖也乃躡以其後則豁然四開巒回徑折
泉下雲散予曰是未可止也夫八紵之廣獨有太白
盤礴峩峨嶧嶨崎嶇神靈秀明磅礴崇崕夫是但謂
未麓近壑然未邃也乃與甄延亥石轉附垂藤升澗
巉壁靜嘯絕岸忽萬里之瞬側何溟渤之未窮雜卉

蒨荔石泉沸騰嘉樹驂乎九御神風颯乎太紜驛駢
散乎銖粒蛟螭視乎細繩電光恍乎山足雷巖浩乎
廣聽零露凝其在衣松濤悠乎啓巖金子曰快哉遊
乎夫造物者僥我以聖智崇我以令德我弗用觀柰
此膚景遂直詣而不回何茫迷之勿騁乃爾若神物
之可憑歷千岩之邃嶺山石儼乎華嵩細流浩乎滄
溟蓬蒿翳乎峰壑墜葉震乎雷霆老人跨鶴從雲前
下笑曰異乎子之善勇也夫太白始峯炎暑冰沍萬
夫之勇亡有敢及况迨於是夫是泉脈應乎坤軸遮
錦極乎越區天窟邇乎可殲神祇恍乎可呼至循崖

之前重谷之裡百鳥不宿神獸亦避雖至人亦幾有
入也越此百里西下陰壑復闢峻岳則金屋龍棟控
亢聳搏異花雜乎瓊瑩儼風冷乎清綽靈芝馥乎滿
郊麒麟馴乎盈郭龍塞屈於平池鳳翩聯於長漠此
則上帝之秘區而太白之闢鑰也其東百里瑤宮蓋
殿萬戶齊啓蒼光青氣四回周起函丹書於億笈紛
朱絃於兆徵散靈藴之如斗歷綺轂之奇靡總百綵
而具存奚瓊桃之如纍此又太乙之宅合陽之宮至
其南也朱雲陸離丹閣霑霧神桂宿日南極奉塵羽
翰極乎麗暉珠貝極乎雕飾鵬鷁駕而鳳軒鯨鯢御

而児履是謂朱明之宮天帝之闕北則至幽號曰玄
府紫微之所宿萬象之所聚玉臺瑩光冰柱炫色
瑚如林水晶四徹雲沈湊而守默氣鬱森而馳走靈
龜玄龍參錯其下松檜接乎帝闕金碧曳乎泉石翼
八獸以守衛役百神而司臭夫皆五天之至精萬化
之樞紐能有至者皆必具靈負秘與抱圖膺錄之士
有天人之德者也已而風柔香墜路諭視空若雙龍
之負引條靈宇之就中隱殊麗乎兩間洞簫鑄乎萬
笙皓歌凝乎飛泉朱絃颯乎翠空座列煥乎雲瑞境
象委乎穹巒環珮鏘乎旖旎禮數儀乎動容予乃攝

衣升堂長揖就位悟人世之囂紛歎靈荷之皇闕乃
與金子終身同丈人居之不去

嘆潦水賦

甲寅秋九月余南望綠野書院時秋序已闌微
雨新霽丹楓載塗青岑彌望同遊諸生各論往
哲務極鋪叙然而渺茫無實不能近道康子憂
之感時序之不回即潦水之將逝作潦水賦
嗟昊天之孔明何人生之斯徊歛歲月以延佇迎塵
靡而不回務談諛之相軋汨理道之禮頽昧明德之
輝耀弗崇高之自媒粵山木之葱蒨亦直遂而上推

矧儀宇之修潔實上帝之所開非枯樸之矯偽何景
景而就痛願自托之修固捐往迹之虛詆嗟蘭茝之
微細乃托迹於崔嵬何斯人之靈秘願放蕩而無核
爰撫景而長思聖哲而取裁用省惕於同志顧中
孚而不猶嘆澆水之非久嗟狂瀾之易摧倘實際之
未悟終事業之未悔也

憫志賦

嗟嗟余窮兮孰余之厄余行欲脩兮予處之索一裘
弗完兮糠粃曷擇冬長寒冽兮暑亦奚絡上帝孔惠
兮既臨予宅曠而弗居兮實予之責嗟彼高人兮胡

有不獲予引獨難兮有行必盡歲月不留兮憂心如
割嗟彼朋友兮各謀爾擇吁嗟奈何兮孰予之格達
人不逢兮自彼古昔匪予一人兮烏敢不踏

觀灤水賦

嗟歎霖之久注何逝者之感懷灤吏川而拯折浮寰
宇而移推走阜石於原陸泡大厦於危杯轂驪微乎
九閻勢摧倒於八垓細渭波於帶縵夷海水於塵埃
但奔雷之奮迅奄轉山而傾頽方馳邁於澎湃寧委
頓於灤洄傷人謀之不穀詛鬼物之相駭或漸殺以
微細將長托以奇侏美質委而不陳芳辰隔而空哀

別知賦

楊子將北上京師其友王子贈之以詩情素舒矣又以書請滌西子賦焉滌西子曰噫嘻子大夫西仕關輔履采宣猷振綱肅紀遇既盛矣遊亦麗矣比其別也迺其心依依然其聲嗚嗚然予竊隘之夫以子大夫嶮嶮高尚之志不相複以道義期望以賢聖乃若兜女子之歛歛嘽迨是非子大夫所聞于天下之豪俊也王子曰子之見細矣聖人不違情以立化智士不詘顯以廢幽夫楊子者天下之士也予承交于楊子由關輔所紀幾三禮矣所以益其不能勉其脩勵

者不可勝道今楊子去我將占廳仕于

天子之庭而予孤處於是過則孰規業則罔最吾是以傷之悲知音之遠既遭值之難也子何以是為細乎蓋子之所未喻也游西子客愧色褚稱謝既久於是掇王子之意于篇著別知賦焉辭曰

若有人兮居玉京覽德輝兮振長纓下天闕兮澗滄海集昌朝兮辟明刑申皇度兮肇修服試辟難兮見攸躅歲悠悠以三改仁熙熙而四覆穀炯炯以延被誦洋洋而表慕歎始遇之咸怡矧久要之云穀居依依以勦切動戀戀而追逐若鄧萍之就礪若楹垣之

待築肆笑言之敦令乃情性之相伏何斷金之足稱
奚如蘭之可衡繫睽違之殆及心耿耿而怦怦覩
景之難追傷欵曲之莫乘驂命駕以並往悵官度之
有程中惶惶而沾濡志靡靡而弗寧於是抽簪陶之
幽思兮冀以道乎情悃曾忉怛而罔暢兮顧多憂之
予沴倘積憤之未宣兮雖有言亦奚盡乃濡筆而申
憮兮曰載卜于詹尹惜他詞以命意兮亮余度亦丕
近於是走下吏布肝膈陳分誼寫紛結托予知以載
歌倡釐翳而為別魂悅物而長引情懷懷而靡悅辟
蕪詞以長跕躅中行而敷說愛何為而有先憎安繇

而妬愜抑嘉會之鮮常斯有間於先哲苟畢志以自
強雖燕秦而豈隔亂曰煌煌鳳飛將安底兮悠悠周
道顧余猶兮昔胡以同今胡仳兮君子之義慎自矢
兮亢既靡揚汚終俛兮敬爾威儀民將軌兮言執子
手且相跂兮端履烟逝惟汝惠兮懷以好音神用燉
兮

後別知賦

劉使君來京師復領西安太守將行余為賦贈之命
曰別知辭曰

陵崇阿之蕭爽覽遠道之渺茫闊黃落之委壤驚時

序之有常何人生之會晤乃歎歡而弗長思白首之
迤邐曾忽散而靡諒覩行李之畢戒慘絃索之具張
彼夫人之遠遊固帝命之攸行徒徘徊以却顧寧名
實之奮揚苟皇輿之既定雖睽阻以曷傷况匏瓜之
在俎奚丈夫之可忘駕四牡以馳邁頤萬姓之允康

止酒賦

嗟日月之昭晰兮從古而然五緺錯陳以建象兮秩
三靈而畢宣曰人惟當其精粹兮云操約而履寬妣
姒知命而盡性兮繇世萬以稱賢繄余胡舛以無良
兮忱特罔於天年欱汎濫以忘迈兮殊莫知來者之

艱難也借曼頽艷舞之曾竒兮亦已久迷而可還也
彼衆人嗤嗤以罔覺兮尚切有憂乎瀰漫矧伊修靈
之是稟兮差則靡對於前言亂曰行自我趾其尤誰
兮往者弗諫今已非兮春甞浮蛆良可懷兮從德而
安欲則危兮沉湎忘反惡奚宜兮古訓昭昭我則違
兮二毛種種此其垂兮逝光不回寧無悲兮

對山集卷之二

康對山先生集卷之三

古詩十篇

迎神湫歌

神湫來雲油油降甘雨沃田疇荷靈貺倏有秋稽首

拜迎神休

神湫來雲田田降甘雨洽原川荷靈貺倏有年拜稽首謝皇天

祈雨歌

日曠曠雲湫湫秋不登夏亦槁皇天不吊民為孽乞
甘霖拜靈昊

天降雨脩滂沱沃我田嘉我禾民不飢否帝惠多感
稽首望靈歌

秦侍御鸚鵡圖

朱光聿起百物言滋被此文羽千禽之儀我依在木
灼灼其華我鳴弗長朱光柰何

悔過詩

徂齡不來謝景詎待覆杯莫收燼灰罔再青春窪窪
白日杲杲自飭弗勤如彼蔓草或潤而達或槁而衰
緝而熙之非予則誰予自謝黜益驕以倨心騫志翔
曠視萬世哲人則敦愚人則疚匪愚之疚予惟斯謬

眷令知風鴻雁知列賢則惠既旣安有竭往或弗知
今已甚明逝茲靡創將大且橫武公戒抑夏祖畏口
繫彼誄人胡寧不守班班虎皮言設之几交交繁言
道則何理尼父惡邪誅以司寇舜憎四兇位在元后
孰云齊民乃怨乃懼若彼水木既發必克 皇運廣
大布德商周閔予置予祖考之休日月方長德輒云
坦伐柯視柯其則豈遠季春壬申日在辛酉式歌不
支可以永矣吾言罔及爾行孔棘君子攸崇是戒是

力

貽鳳麓子

我友鳳麓於今念年衆口鑠石惟我知賢方復曠日
若凌九天鉅視萬物驚志占先閉門著述刻意太玄
暇則執耜躬耕漳川蒔藥蓀木沮溺比肩知予避世
厭居市廩時過滸西究此群編敦德敏學守方智斷
今日壬子燕爾東田博觀古蹟載濯長淵情熙意暢
蔚若遊仙我詩贈子興以言宣世萬弗斁清廟朱絰

送閻公甫

表弟公甫刑部以公事便道省墓於馬嵬就過訪
予滸西別業居五日情誼洽矣倏焉將別公甫曰
弟不敏願有以承兄之教得寡過焉予往與公甫

語高不抗卑不汚意遠而弗荒指近而不淺奚俟
於予言而後能寡過者然公甫之意則歛然若無
也於是為之說曰於乎今之所謂士大夫者於古
人之道莫不誦習愛慕以佩之於終身至其見之
行事則與古人不啻秦越不相及此無他不得其
旨趣臨時倉皇不覺自眩故遠則鶩於荒近則詭
於窒蓋徒欲以抗為高以汚為卑又惡能與古人
似也公甫勉哉中庸曰脩身則道立親賢則不惑
夫欲自立其道非親賢則理不得而道晦晦則惑
惑則無所往而不窒予重恨世之士大夫竊古人

之迹肆危峻之論不能近求厥旨以自窒也是以重與公甫發明此意凡以欲公甫努力於是而已聞公甫在京師所與交皆長厚敦樸之士今之所論已槩見矣公甫勉哉孟子曰君子之言也不下帶而道存焉道固未遠夫人也欲遠人以為道斯子思子所不取矣士大夫何憚而為危峻之論以至離道之遠哉公甫曰溥不敏請若兄之言於終身今而後或得以寡過矣於是又係之以詩曰

昔余戎祖嘉爾大父迪德履仁克循厥武文定其祥妻我太姑允翼允嚴自求多祜耀德昌朝埒名伊傳

墮羽中行談笑靡顧若珠在淵光焰彌驚沫風茹休
良士如赴遺文在編厥聲載路凡我後生畢遵其步
其遵伊何匪直其文信道罔飭雖和不群大雅旣亡
光範式存眷予小子爰視前聞契肖雖忝影響必敦
肆當弱冠其從如雲嘉惟吾弟其學克勤總角於變
靡有不臻馬公善鑒於第猶云少宜加養必配古人
凡余話言必信且珍放弗謂免顯詎肯因我閭中躡
予憂寔慙恢時續祖聿大厥門赫赫輝輝卓有令孫
分署西曹執平靡恥靖恭是脩堅白必辨武旣不吐
宋亦奚先道立譽長君子是羨奉 詔西邁事無弗

練予駕言東肅承清旋折旋孔佳紛糾斯刺回思馬
公言豈無見

天子明聖方事安貞欲匡厥猷微

汝孰彥我思古人溫恭允塞惟弟其念往焉若晝緊

彼哲士前軌孔赫克念則然罔念則刺謗謗碩人莫

不是則發言不程逸輓棄轍恒悝未融惟隱之願卒

底顛覆奚益安宅子返舊曹為

天子使祛爾繁

細允欽厥位勿覩狂斐篤操秉義用光爾祖以畢初

志游西峩峩漆沮湯湯握手載歌其風肆長酌以太

斗佑以兕觥子不予醜尚繹勿忘

贈楊秉衡

正德九年二月一日吏部以浙江按察司缺副使聞上命知漢中府楊侯往漢中府同知何子奇自朝覲歸屬余為詩表之文旆以贈其行夫蒸民之作自彼吉甫由來旣久祖述遂繁楊侯恢德博才嘉政實德漢民懷之如厥慈母宜不可忘遂為之辭曰

皇明丕興八表咸一已已以來萬民罔謐由蜀底冀至於鄒密焚蕩猖獗處無完室六載番番其劇惟漢川陝荆襄師旅巨萬民旣化離盜益滋蔓士無宿糧將徒永嘆時哉惟侯其德孔惠桓桓發發何有弗濟

簡我民役咸平靡戾息我民苦巨細必計賊已悉定
侯乃云遷際侯之恩漢民是天老幼婦子祝侯萬年
侯往雖亟侯心則懸漢民誰庇漢土安澤小大咸想
侯車已策扳轍留侯帝命孔赫民為侯泣侯為民咋
其泣匪他感侯如天在昔兵燹流散顛連影以形弔
情與事煎杯水療渴孟鉉理餓大惠若此民將焉那
懷侯豈諛歌德罔過侯惟保哉下民之賀侯才甚明
侯請孔直學非遜辭心豈雕飭至孝窿窿斯民是式
彰善殫惡侯度允得漢水湯湯四月維夏百姓送侯
于彼江下何君率祖典禮攸攸風微氣和觀者盈疇

帝德日新侯乘當重霸既登樞憬尤資用公德不回
民心所共欲知休羨第觀茲頌

太白操

太白兮何為日中兮揚輝昊天兮孔明我陳兮誰聽
徘徊兮路窮自顧兮傷衷

當歌絕絃

余懷佳人兮山川間之當歌絕絃兮余心孔悲芳年
不再兮客華易衰咄嗟時命兮噫將尤誰

握手歌

春日遲兮景芳鳥鳴喈喈兮孔陽與君握手兮相將

前度飛坂兮後岡同心之音兮自長矢中夜兮未央
雜調十五篇

能官行

官能不在吏吏巧還殺人今之官長愛深文蒸黎轉
徙徒紛紛君不見李斯未死陳涉動赫赫秦威竟何
用

夾河戰

故崇安侯譚淵隨

文廟內靖至夾河御

幄有虎來犯淵引弓射虎死明日大戰淵死
疑虎為淵元身謂不可射歸諸理作夾河戰

夾河戰事已亟張御幄虎來逼將軍怒目射虎死來
日沙場身且殞元神之說古亦有將軍之射乃其守
可使身後殪毋使虎前走君不見軍中壯士空千萬
倉卒虎至無人見眼底不知報主恩何況明朝夾河
戰

寧郭尉

寧郭尉勢如虎夜逼人至亭午手持黃紙呼御符前
村後村尋過夫遯夫盡逃妻獨存家家背縛巖欲吞
尉家有母亦有妻人生百事難比齊君不見西山食
人虎牙爪亦何惡有時不自雄卒為人所縛果然卒

為人所縛舊時牙瓜將安作

鴈門太守行

城中起風城外霏雪豈無梯袍胡來則刦嗟嗟柰何
胡雖刦我袍空猶有粟胡今不來粟則無有嗟嗟柰
何負戈出門可以殺虎執皮我役不敢惰吏反捉我
嗟嗟柰何皇皇車輪皂隸在御聞有太守來也今日
胡不刦汝吏不捉汝也柰何嗟嗟

古倚歌

樓上喜風樓下苦寒廣衢修路何時還與君酌酒看
朱顏車馳馬驟各有歡逝者如斯猗長嘆安得此身

雙羽翰飛遊逍遙浮雲端

雉鳴曲

梧絲長井絲短朝出門去夜歸晚妻死無食食樹實
為我謂妻令之返妻去不我顧兒女牽衣啼入室何
所見徘徊看故衣看衣不覺卧繞階翛翛鳴雉飛

送楊用之還武功

東風失意悲芳草歸人西出長安道長安道上車馬
多空使韶華望中老君不見舊時同遊者紛紛曳縞
向長安嗟君尚爾誤儒冠袖中龍劍應如昔何得愁
人白眼看

涇野子與余居旣數日陟降原隰臨眺川陸二
美具集百情咸暢辛丑之夜宴歸學宮風雨
忽作因秉燭相對慨然興懷擊筑長歌悲婉
激壯之聲古之志士未之能或先也因倚而
和之如此固已媿涇野子之所陳矣

噫嘻嗟乎子之來縷縷兮邈不能遺覩而將復吾誰
與兮鳴泉湔湔愁人心嗟尔歸旦夜苦長吾心獨悲
兮誓將羽翼摩天飛懷子以好音已而已而東方離

與呂子發滻西

蒼雲爛白日長並轡遊躋曲房君去不來我心傷山

寂寂閒無侶。愁撿故詩歷。孤嶼孤嶼亭亭當大河下。
有萬尺之洪波。洪波萬尺有時盡。此意悠悠君若何。
同仲木往滸西別業

春日遲兮景芳鳥鳴喈喈孔揚與君握手相將前度
飛坂後岡同心之音自長矢中夜兮未央
相逢行

汝從雍州至我自華山來秋風木葉落相見舍元臺
管絃簫瑟不可聞子奏伊州何壯哉半月不飲長安
酒因爾立空三萬杯繁華自古易衰歇歎爾風流旖

旎才

一
卷之三
七
歎息歌

歎息復歎息歎息如何及伏雌抱鴨誠有然蝶羸祝子
真堪泣渠顧為鴨君為雞那憶行年已三十撫育豈
因薪水勞紛擎反使肝腸繫畜犬解尋主畜貓可禦
鼠老大還無寸艸心此輩成人在何許世事悠悠着
力難憑君不必苦憂嘆早携藜杖過蓬蓽同去東山
訪謝安

楊白花

人生湏遣家富豪黃金不多名不高韓信乞市丐人
悔世間誰肯為爾曹前年脚夫王仲深今年處處稱

官人權家貴客滿戶入舊時行輩何足論君不見楊
白花一朝風起滿天玉世上榮華誰是足

古別離

君不見邊西戎子夜走馬釋轡直前人盡下又不見
洛陽少婦夜深哭丈夫十載龍荒宿古來緝邊如緝
網願得將軍如李廣

古邊城曲

胡人騎馬來邊城滿城痛哭無寸兵眼前不可保旦
夕春深况敢思深耕黑頭將軍徒自雄旗竿半偃城
半空天王日日修武備閨中夜夜傷夫婿

對山集卷之三

謁綠野書院

吾道本昭晰誰為岐路漫攬衣拜祠下悠悠起長歎
先生起郿塢挺然障頽濶講道綠野亭學人得大觀
遺址沒兵燹興復亦屢難別茲忽三載踪跡絆微官
去國但今夕登拜宴茲壇歲華奄已暮朱光耿難拔
努力徇往訓諒能趨所安

長寧留別錢送親友

悽悽去鄉國悠悠天一方感君遠相餞此情安可忘
長寧有美酒願言酌千觴心悲氣自結顏醉志彌傷
父要如不棄慰我以周行

咸陽谷濟元家宴集

昔病卧床褥感子獨憂思咸陽對君酒劇飲欵千卮
猗猗窗下蘭霏霏雨中絲相值不相樂君看園中葵

華州書懷

欲去不可去欲歸何以歸樓涼岐路下事事與心違
九月出門戶仲冬仍依依時命苟不逮百念轉首非
山凍萬石齒風雪千里飛半世逐萍梗何時能息機

華州對少華山

凍林夕陽下山色轉來翠回峯歛若飛曲磴轟將墜
灝氣發山足泉聲響空廩別此何日來展轉起長喟

華州寧山寺作

我來華州城羈縻已彌月百憂結我腸展轉那能歇
徒聞火華峯安得至其樾今日忽言邁良友咸趨謁
指點寧山寺奇瑰實超越下道百步遠怒石如標揭
前趨路愈難轉深轉如鈍中立俯來處泉石亂如趙
突碑及汎浼似欲作齧乾山底方見山直與上帝許
凹壑出松濤怒吼后土瓶曲磴轉蒙翳我行已力竭
入門瞻益寬韓衛若倏忽相當太華巔應是盡溟渤
往時驛道松睂睂細如荊山僧陳寺始自古氣不伐
鎮茲少華山百脉如扣輒地盛物自豐顧爾安能窮

升堂接廣筵
蓬豆紛以烈
俳優列絲竹
音聲何清發
感我山林思苦
茲千里趨朋友
具執手怒懃欲空醜
追維在州時懷抱
日以艷愁多病益侵佇
立空餘骨
歲月去不回
人事如飛鶴
今者不相歡
柰北逝者汨
日暮分手時
撫膺有餘咄

潼關早發

早發潼關道微風
動林木長峽百里去
我行正僕僕
大風變頓刻萬里慘
以逐樹杪聞
過沙何須問平陸
我口不可開
我身只匍匐
輓車兩少年
行行亦長哭
云是閔鄉人
先世有官祿
縣官急邊糧
十戶九逃伏

至長利賂錢我故苦獨速太平作男兒庸調天亦福
所恨身不長筋力易羸蹙母寡已十年蕭條但空櫝
有田不得耕有事在忽倏近歲嚴轉輸使者日三復
迢迢百里途如歷經緯軸我煥亢如火我行迅如翻
吏來督我行躍馬恨不驚使者計押錢鞭鞬褫我服
我寃向孰陳我淚向天灑語終心益傷轂吞色猶恧
我感少年語淪泪泣如瀝皇明百年來萬姓各康
育艸木亦有滋少年爾曷顧匈奴二三載驕氣如鷁
鷁主將小兒行焉能辦鎌鋤尔居見尔難不見九邊
族一夫八人管剥削盡膏肉往者禁軍出人家無完

畜資力代出役瘁敝內供穀土炕亦見奪何況妻與
僕此本亡賴子亡命入軍牘三帥皆詭隨安知有鈴
束少年爾莫苦 主上正恭穆行當致雍熙邊庭求
安肅爾身當不勞尔家亦求復少年感我言再拜向
天祝願 主萬年壽保我有饊粥願民如春艸長養
無踐殯輓車向西去氣色稍睦睦

峽石逢正夫武選

日暮駐峽石故人欣在驛我手猶皴瘃君堂已開廣
佳肴芬以繁肴酒清且碧地僻山更深凡百豈易索
岐路倦客心相逢念疇昔鄉關君日親風塵我方劇

時忽夜分頽然起巾幘

馬三丈於懷慶娶予

堂下鳴絲竹堂上泛壺觴依依千里情燦燦燈燭光
盛時易徂謝佳會安可常北風起晨夕行子感故鄉
肯酒旣清苾邇豆復芬芳願言共今夕期以莫相忘

劉安陽克紹畫錦堂宴集同敬夫翰長聯句

三冬盡行旅萬里黯愁色鄴城歲除日康虛堂燭明
夕相顧意轉親王相憐路還亥魏公真子師康歐子
豈公敵宿志凌臯夔王平生本沙礮敢擬此飲歡康
獨切親闈憶驚心雁北歸王承顏意西極文名重三

檢原時以長與楚城石邦彦內江劉德大俱為翰林檢討有文名世稱翰林三檢云云交情媿聯翼雕蟲藝何

貴王橫玉光豈傾逝波嗟不回廉寸陰良可惜宴言重微陳王同君永明德康

鄴城同諸公於趙王府宴集

新春淑氣回賢王開邸宴金石懸前楹賓客萃別殿歡樂難具陳日夕意彌善嗟彼七子遊萬世猶欣羨朝退避雨沈澄甫逆旅就酌

冒雨過君舍君當為予沾問君今幾月不與人提壺肯酒不在遠但與相親娛百歲若一瞬可為塵事拘人非王子喬不飲胡為乎

夢故鄉親友

遊子苦萬里感歎志彌傷齋坐日方午幽思積中腸
逶迤出戶牖委曲仍登堂親交坐相與斟酌倏千觴志
意甚浹洽笑言復悠揚覺來意忽忽不知棲帝鄉朱
顏旣難駐後會未可量關空撫園葵零淚霑衣裳

耶事

錯錯復錯錯與子寧相薄我以網羅嗟嗟今則那
似今且猶可非今將若何

樓上曲

秦女鳴秦箏絃悲調復清今日風雪至郎在涼州城

雖是涼州苦還家那得寧

同段德光夜酌

白日西南馳人生直如寄芳林春風發百物暢以萃
若心誦金石良晤成斯醉于焉靡歡洽倏忽老將至
孔跖今安存何湏辨真偽

雜興二首

故鄉杳無際山川亦悠哉旣非遁世徒而豈濟川才
竊食避耕織對客倦襟懷曲枕日當午悠然南風來
耿耿乎所願何必凌雲臺

其二

游西亦嘉勝日日有襟期田漁俯川陸葵藿滿階墀
野叟遺濁醪嘉樹過涼颸微醺上崇嶺遯眺引東菑
牧笛風外來園禽鳴別枝晴足發新懷此心誰得知

觀漁梁

直西漳川水水暖有魚遊僮僕值農隙揭梁漳川頭
壓石作深溜刺目避湔流欲辭鉤厄反為曲簿留
願為梁上死不作餌中收梁上死何惜所畏鉤中羞

辛未元日

昔構游西宅今此遂閒居崇原羅縣縣交河帶蟠壠
徘徊增襟槩眺望引樵漁歲首獸人役駕言暫紓徐

悠然歌考槃茲樂誰可如

觀刈麥

五月麥已黃宵征許西曲婦子偕我行共欣土膏沃一畝穫滿車刈丁訐相矚削藉反田野此外更何欲糠粃所不厭嘉穫况已足笑看場上積何不引醞錄

窮居

窮居鮮人事田叟過相於歡息稼穡好酌酒復嘗魚醉坐碧草間偶然念園蔬斬竹架瓜瓠壘石堰流瀦清風拂面來襟懷遂清舒徘徊夕陽下中情誰復如

懷呂仲木胡孝思兩君子

兩生皆時彥並鳴絕萬人悉以兄事我何異骨肉親
呂也卧不出胡亦遠辭秦間關蜀道惡棲遲渭濱
盛世需豪俊此物惟尔真不謬被罔遂憂國嘵餘屯
心壯義自激道厚履彌珍同惡我不誣足譽人所嗔
徒有經濟策安能及斯民甘為螻𧔗賤不嫌苴土塵
傳生在墻堵尚父住磻津孤懷有誰竟念尔益霑巾

離詩二首答東岡先生

中道值嶮巇積歲橫昏霧淹留各有因慷慨懷往度
蒸生奪九錫皇先抱孤素隱顯迹固殊芳芬理誰誣
弔景增遠悲捫衷益深懼意氣精靈施馳騖瞬息故

卷之四
春言謝茲役啣杯玩芳樹

其二

賈生際昌運獻納鮮不撝志士具鴻達要之有所如
斷羽無騫翔決水無廣瀦雖富萬人俊棄擲同土苴
衆女自為妍獨樹終見屠時徂急奔箭裏結鬱膠淤
君門萬里隔安用苦躊躇

聞王敬夫消息

敬夫當世俊高義人所知運徂被罔逐光謝蒙厚疑
未飽壽州飯尚蒙妖豎嗤抱芳竟長歌悲彼團扇詩
西城冬十月與子並轡行宛轉護主意鑒者天上星

天星永不滅君懷豈復停濯濯白縠裳姈姈當白女
頰如春花鮮音如青鸞語解舞燕代稀能歌齊趙絕
自謂可君心君心一朝別空房悲獨知百年紙長咽

有所思

晨起望歡來日午歡不至薄懷雖自動遐情君已異
擲此玳瑁簪脩被雲霄翼高飛摩蒼天低飛盡溟渤
或底仙人丘或止王母闕食玉求長生乘風討幽歇
芥蒂非所佳安可使中竭

暮春與張朝聘雨中夜坐

膏雨秀時麥蒸雲迷遠村冲抱本濟物虛襟久含溫

瀟勝見長蔓侵幌喜交痕天地自廣育朝廷原獨尊
寇盜枉鼙粉虎臣如蜂屯明日首夏節開霽見暘暾
君況留侯裔偃蹇待高騫宿質應弧矢今志畧鯨鯢
馮唐終上論甘茂仍有孫憑君拭雄劍早晚清玉門

歸自長寧道中懷子衡

飛飛麗高蓋望望指榮木蒼岫迴遲光巉原帶交陸
翩翩獨歸翼堂堂君子轂昔瞻眷已深今歎心具服
彌節欣旦輿微言薄虞穆丹鳳鳴高岡駕馬飽苜蓿
枉訊慚父要遠別强新灑再晤安可知遐往每中熱
羨爾心迹并嗟予岐路鞠抱獸煩廣宣劃穢冀長剏

胥此相思憂我曹志有畜

在游西別業聞呂子仲木見訪

絕世閉丘壑故人天上来喜劇跨驢出還以夢寐猜
昔遊背鄉邑出入唯子陪金闕白虎闔紫陌燕雲臺
繁華瞬息邁僉晤轉首乖君才超且逸遠追周孔匹
緝學曠代稀陳猷萬夫慄國步茲少艱微君在良弼
龍臥空兩春梟鳴已終日何不疾命駿令此星運謐
爪瓠豈宿心蘚甃本故質甘為市井羞敢墮君子恤
今夕復何夕子來問蓬蓽方深和寡悲安知酒漓糲
呼童從雛雞喚婦修品食但得沾笑言午夜詎終極

同仲木謁后稷祠

凌晨並遄謁。履和想延休。徂勲超臯代。功績啓成周。
道厚往自迥。本盛芳故流。秉文羨清頌。徧德欽雅謳。
遐景詎有邁。鳴烈曾未劉。遺封藹餘化。闕殿錯端旒。
報享旣敦穆。瞻仰益虔修。食德乃不淑。涕言愧茲疇。

同仲木謁橫渠先生祠

覽眺陟雄嶧。欽訪降周原。蒼松翳廣殿。碧岫當崇門。
氣暢百形麗。跡勝千古尊。繄昔此夫子。壯志等峴嶧。
折衷旣因謬。為道久彌尊。微言亦屢示。至德要獨存。
悲哉跡日遠。邈矣述者繁。精英顧莫逮。糠粃寧可殞。

講嚴理益晦源涸流豈奔幽懷每長喟景穢言復吞

二月二十八日同呂子過武水聯句

東行陝崇阪言念游西曲集翠律先後圍盤糾古今

矚屏波混散景

德清

迴瀾薄山足川柳柔以飄

集

岩松

蹇而撲白鷗亂浮汀

德清

黃鳥矯

集

出谷歡來千日輕

集

事往瞬息局局揚我詣精理行矣慎遐躅

德清

尊酒春山

中何時復相屬

集

雨中獨坐三首

微宦博群口理棹返柴荆迹枉徒自厚譽寡誰見明
接纓歎沮溺種瓠笑東陵旭日陝臯陸因之眺園英

雖非素心賞聊寄千里情

秋雲澹空碧細雨濛高墻茅茨苦蒸濕百川復騰沸
蕩漾旣有時昏墊豈無謂撫景傷故思環堦發蒼卉
酌酒鮮同侶岑寂何以慰

昔往愛驚翮今逝惟垂翼豈圖礲上遊固畏雲間弋
事謝形自休光淪體應匿賈生赴長沙張騫問西域
情好良有因百爾係所值

扶風道中

削籍喜康歲薄遊嘉盛年遄車詣岐縣訪舊嘆古賢
亭亭當秋樹潺潺鳴澗泉序清景茲倩節返理誰憐

深秋事佳遊長歌厭輕默早泥期卜築終以臥斯便
望神林寺

流潦浩無盡漣塗安所窮驛興捷若羽鳴泉倏千重
招提靄曠陸烟火鬱修籬停驂慨將覽鞅掌那可終
何能載玄雀逍遙隨園公

西嚴村

已達西嚴村忽見郝村樹矇矓日未中慘澹昏雨布
積潦迷古泉白楊慘新幕華落不再揚景謝豈仍駐
所以遊賞思遲遲橫寐寤鼃勉甘水坊彷彿空翠墅
笑語計宵軼瞻眺待朝暉心悰苟終愜何須怨遲莫

風

春來久不雨欲雨仍多風我自武功發天地俱塵蒙
行次少華麓遙號若山崩頓踣那可道歷歷辛苦同
胡不摧珍氣令此雨暘通倘彌萬夫望方欽鼓盪功

泛舟至終南

黑水旣瀰漫撰舟浮渭東新霽水波足浩若御天風
方懼榜欹作忽見終南宮遭廻三十里轉盼即已通
陸邁豈不適舟行實從容安流解驅迫履險畚有終
旣辭震轡後仍奏瞬息功因忍駕赤鯉直叩蓬萊峯

東原瞻眺

積晦乏佳况瀕行欣霽天川原鬱含翠村落廻浮煙
流潦漸已盡徐風澹相舉雖無惠連詠尚意明遠篇
撫景生遠思覽曠感遐年志念未殊昔憂否忽成煎
悔迷廣成技空羨伯陽仙于焉恣遊眺庶以慰心迷遭

敢循會稽僻冀嗣鹿門賢大道本茫昧吾意卑草玄

同諸君於良璧園亭集答時濟

客行乏良思入座逸興生雖無管絃奏顧多慷慨情
烟蘿翳明月沼荷枯翠莖于焉感宿昔美酒為君傾
今日五陵下誰識田寶名

壬辰元日

節序孟春届予年欣已長撫躬耿不怍行樂或已荒
昔壯志四海今憊愧五羊因心苟不餽率履常益強
陶生柴桑里龐公鹿門塲但使所思適百年安可妨

十月一日書懷

老去人事疎非謂懽悰寡有時忽小吟坐對南山下
今旣不如昔後豈勝今者節物自相紹少壯安能假
頗思鍊雲英共結白蓮社

對山集卷之四

廉對山先生集卷之五

五言古詩

同承裕作之過游西別業

還耕悵初顧。揖世返空林。雖非志士理。已獲靜者心。
嘉賓青雲客。枉駕忽相臨。携酒共斟酌。張絃揚妙音。
義厚情自叶。道合契滋深。漪漪漳川水。幽幽南山岑。
相值不相樂。柰此逝者侵。

元日同諸弟安東序

自我登科來。倏已十三載。芳與吾所知。堅白世仍改。
感嘆謝。明世徜徉遊。陸海本是葵。蘿姿敢壓。

廟堂采旭日 照西堂
歲初幸和藪 與爾共斟酌
歡歌益瀟灑 果叶滄浪心安為塵氛免

朱升之祖德詩

玄馭往難返 厚澤遠彌新
因觀後人孝愈信 逝者仁琴聲宛在 席鶴唳如有聞
徒勤翠枝想誰傳 素空陳
名章一為耀 千古詎應泯

四月七日雨中同文浮山坐酌

初夏草木長 呕爾更相過
來牟生意佳 枝旗望如織
陽日不下臨 此物終且餓
往者已已夏 頗為旱乾戚
徂春苦無雨 田疇生意息
因懷老農語 往往未差忒

窮居繁生齒所恃耕織力明日更如此與君當惻惻

子卿泣別圖

廿年繫異國感別會仍艱置酒話夙昔詎終千萬端
嘆息淚沾臆徒令摧肺肝昔為雙飛龍今為孤翼鸞
丈夫耻微諒况爾烈士顏躍馬窖上別欲歸中自難
徒切報主恨安悔軍吏言勝負有微數奮勵心所安
所以君子人不處嫌疑間

贈用昭

宿志苟如此何足言棄捐賦性本迂薄長遊適茲年
雖被群口紓尚慕夷惠賢秉耕事場禾同俗謹方圓

杯酌取適意糴肆無昔愆當階植葵榴穠艷亦堪憐
賓客時晏至行樂鼓危絃擊牛旣不易烹飪有時鮮
微醺步幽隩清歌凌晚川念子有佳興影然詣吾阡
並坐話茲事古今誰比肩皓首不努力世萬安可傳

近山尚書莊上

春風纈芳林虛堂翳脩竹苟愜靜者心寧慙世人目
昔予懷此遊悠悠幾更宿豈期聯輿來沉醉卧茲曲
高歌嘆往蹤遐眺覽前躅主人古司徒雅興薄裴陸
但能永今夕何憂乏醑醕

哀王朝列

先人寓南都朝列實所厚素欽清淨懷豈但通家舊
博才與世違高風實難圓桂冠國東門艤稼瀼西墅
仰情望天雲扶筇步孤嶼自謂羲皇人豈但貪可吐
隱居四十年仙輿竟長舉松栢翳穹窿叙述徧寰宇
微辭陳父要匪直慰儔侶雖乏桂酒陳或擬吳陵糈

哀王中憲

中憲有俊才我自童子知詞源鴻三峽豪氣凌九涯
少年取高第倏致清要司科謬竄群枉問俗正 皇
規秦越及幽冀至今常凡驚風無寧翼喬木有樛枝
外臺早見擢長意浩無期勁節挺不改直道耿難馳

遊屈萬里翩名遂千古奇往哲俱如此於君何復疑
敬讀後齋稿惻愴有餘悲

悲哉行

拭淚坐永夜角聲一何悲羅敷有心事欲語復思惟
徘徊掩嚮鏡迤邐卷羅衣初為君家婦貞潔有容姿
今年二十五不意被君嗤娶妻以嗣續豈如陌上兒
問君後房妾詎不知令儀熙陽萬芳啓嚴寒忽凌澌
節物尚改革人事奚見疑微辭陳君前寒暖君自知
願言欽令德毋為後人疵

短歌行

擊鼓會佳客秩秩滿中堂齊娥揚妙音越女奉徽觴
良時不重至此樂亦豈常倉庚枝上鳴鼠婦來我牀
節物日以蹙人事安可量感慨立前楹翫月步周廊
昨日一何壯今日一何短展轉意彌劇惻惻遂心傷
探壺取青酒斟酌夜未央嗟我同懷人戒之慎勿忘

思歌行

樂事弗重至好會難聚常當杯不歡飲其如後者妨
有田不種粟有園不種桑坐待飢寒迫空令聞者傷

易歌行

良時苦易失好花不重芳裏首待富貴白日忽無光

有酒即斟酌尚恐臨事妨如何市井徒心志不廣長
儲金望成埒積粟望成岡志願雖償愜歲月安得常
力瘁神乃去忽然斃中堂有粟不可握有金不可將
平生豆羨較況肯厚死喪肉為螻蟻啄妻子無憂腸
結交邪枉客志意各飛揚馳馬復聞鷄絃歌夜行觴
百事比先健行步如雲翔景屬此曹好事留居者愴
寄伯循

秋風西北來偃蹇坐茅屋四壁無纖塵當牕有書牘
不問坐者誰啓牕再三讀一讀意已駭三讀見裏曲
憶昔年少時心志各有蓄不意謬通籍先君被薄祿

朝夕望君起如彼饑者穀我已罷館職君方屢官祿
味苦不可人旋車亦何促

主上堯舜姿舊章理當復平生稷契心豈為世情擾
尚期謹藥石慰此百姓蹙予也素蹇劣茲志每中熟
以乏酒遜懷幾搆邪罔獄顧影苟不虧於道果奚辱
山水性所嗜喧恢豈吾欲屈指君歸來三年但忽倏
人生不滿百激勵在初服可似山中人忘機泛醻醻
示昭胤兒子胤讀書學文駸可上達然頗事違
冶玩帽歲月乃以此示之

勵志貴青春登途謹康歲箕土可為山所戒在紛戾

努力不自茲老大竟何濟

有感

曾參不殺人魯連蹈東海志士各有懷肯為塵氛浼
細吟獨漉篇長歌楊之水采薇首陽山吹簫洞庭匪
但使心意舒何憂世塊磊

讀史二首

鴻雁不老越蛟龍不潛岡平生志嘉遁佐儲抑何狂
因嘆務光輩惻惻令心傷傳記尚溢美其言或荒唐
嗟彼高帝業赫赫繼三王孺子安所見胡為遽辭商
契會視豪傑出處聖所詳感嘆擲其策願為史臣張

其二

天邊有黃鸝高飛一千里烈士耻庸節世事特敝屣
朝辭上東門莫從赤松子感慨風雲期超悟往還理
進既有所因退亦何所倚獵犬貪兔狐不免炷傍死
富貴多嶮巇英雄如螻蟻所以明哲人窮達重徇已

寄溫民懷

幼小擅文墨老大轉崎嶇相逢金臺下飄飄神仙質
當時各輕忽領會未周悉但為語咷喧未究風雅實
竭來坐幽壑默默思徃日始知逸興多允哉予所匹
去年季春初君來過蓬蓽情與千里先會以頃刻失

雖承枉書札心竊負羞懼時我在渼陂嘆息使心惄
繫茲十年別朝夕宛如一秋雨賓客疎翻書檢名筆
緬惟君子義不語但首疾丈夫蔑小嫌英雄重身畢
憶答京華秋慷慨難具述鴻毛視富貴萬類若捫虱
唯君知此心往往談道術戊辰抵丁丑倏忽周歲律
狂歌窮谷間可為形影恤譬如籠中鳥得放返巢窟
豈有依世心更為稻梁出寄君聊共嘆世故風馬逸

用昭東歸華山率爾有懷二首

鳴鞭指華麓欵駕越涇川逸興旣涌蕩麗景忽見遷
翳翳南山齋遲遲西堂月絲竹滿我前清商與誰發

其二

十日忽言別良晤何時再握手坐君堂如飲雲中鑿
披意唱新語頌夜理微辭開帙動成趣何時忘令儀

首山行

我從華陰來逢君長安陌長安車馬多客心苦逼迫
感君夜沽酒翩翩話疇昔倏然若翔鳳萬里寧可掩
世儒正崆峒從誰覓風格首山連華嵩古謂黃帝宅
君固首山人結廬值其昧佳宦縮銀黃素心羞烜赫
恨不策杖遊憑高倒巾情激泉引綠水微歌坐玄石
但使幽思成肯令芳意閼昔在京華日羨君神氣適

頗似仙人儔邈與世氣革魂志終靡違爛操竟難蹠
因君起承嘆豈是山水僻聖化被流沙萬彙且豐溢
均彼適性歡敢念別群惜歲月同逝波生理異驚翮
碧樹茲已長蒼苔疊如繹會當詣嵩麓因君訪周易
贈彭尚書濟物北上三十韻

明興十三紀逖德唐虞遠歷世具徽羨奉天無罪尤
孝皇昔在御四海有餘休深仁被遐邇厚德孰與侔
暨我 殇皇帝聖智天所麻雖有群豎狎尚匪新政
差諸公大乏理怒目如電逼遂使蹇讓禍幾為宗
社憂瑾永遞澎湃寧彬遂紛浮鯁日踈遠昌言誰

見收功德反摧挫屠沽皆列侯大起疆圉事巡幸經
五秋豈但轉輸苦尚多羅纖愁逮繫盡九族勘覈無
一讐天下若鼎沸誰能善身謀仕宦自相好山林皆
寄囚未可保朝夕况復尋勝遊我

聖起南服巍

巍舜禹傳立斷凶凶死倏建萬世猷勤渠覓元老奮
迅康八州詔書許更始生靈免虔剗夫子皇夔徒素
心景伊周窮居志萬古勘定凡幾取青史不輟紀
先皇仍見優勲康塞人字簡在蓋天諭感公過相訪
愧予瞻瞽流安能達大雅聊以序民幽嫠婦不恤緯
君子宜有求肇遊旣感慨莫節應曠脩吾非兒女子

安用歌別謳

詠懷

窮居無別悰掃徑揖清靄濁醪自斟酌幽花復芬鬱
雖微恣性歡亦鮮迷津輒寒虫相續鳴潦水參瓦沛
節物漸以更人事紛相代猗彼巢由徒曠音昭物外

德充第至

飄飄神仙姿悠悠燕秦道飭車纔幾時倏來慰孤抱
烹羊醞新酒朗吟對穹昊苟遂酬勸歡安知訏叱懊
烈火鑠良金光燦久彌耀南園松菊長東汎蒹葭老
旦將終日遊續我蘇門嘯

清溪老人歌

托廬楚山下復愛楚水清因為清溪人常歌清溪行
激波混朝霽玄湍澄夕泓理靜百穢徹道在千載貞
前流遠彌匪後派長且榮探花服初始沂瀾欽晚生
願申得一勸求保世萬盟

長寧望先塋示諸弟

逖哉世德烈邈矣徽音暢及予蓋九葉遵道敢孤曠
雖微宋臣述豈肖馬生誣冠裳西冠雍文采遠慙向
松楸麗茲原芳馨載宿鬯事以久方白德顧遠彌亮
鼻祖猶何長遭時實骯髒雖抱風雲姿聿敦畎畝報

洎我西原公造請益高尚蘊博陋巵奉光睿跨籍揚
裔視鄒魯真德校務隨妄再世具敦穆流慶殊豐盈
明初生達人康濟古無讓旣樹宏遠規復慎豐亨嚮
勛業動神后名德懾婉將因心謝茅土遜志抑浮浪
逶迤及茲辰瑰璋未凋喪食粟思天功曳履念哲匠
昆弟各有懷簪組匪吾上惟能樹德音斯可副玄睨
翼以寧乃翀波以激斯宕國乏千祝延宗鮮百年亢
譬如西頰陽轉忽見悽愴猗想平陵侯傳世一何壯
封拜歷累代烜赫據光望旌苒至皇明誰能辨後墳
盛衰本天道昭格良有狀枝木不再榮熄炬鮮重炳

懲慤告來裔。黽勉責昆行。頑言諦茲篇。用述吾宗倡。

得弟德克書

憐爾萋斐人。遠滯巴子國。素心仍起羞。遜志果安得。
此曹父麾霍。睚眦動成慝。何若返南川。同予醉秋色。

往盩厔訪王子明叔

駕言詣秦衢。南往遂良覲。嶺雪旣消散。惠風復披拂。
羲陽啓朝輝。洞野喧牧笛。豪遊意益暢。嘉賞事方逖。
撰杖陟崇原。載酒望迴壁。懷人志丘壑。夷險久經歷。
豈卑平子吟。聊儼微毛生。檄降念困靡。革德音近愈憇。
采苓南山陲。弭節聽泉激。期君畢莫春。庶以慰孤僻。

燕明叔東亭子

嗣歲集高陵良晤傾古昔今晨燕盞座遼興更超奕
雖無絲竹陳幸對風雅客酒酣幽興發至論光綺席
子本素心人抗志陋鄙嶧繫物莫染磊落俗豈格
頃言念父要百歲以為遠

盞座喜太微至

此日復何日眷言會君子方擬策馬尋忽焉具來止
來止將何為握手論古史春城沽酒佳斟酌一何喜
普緣古仙遊山水嘉無比若賦南山篇請君自茲始

馬融洞

昔賢托茲室，討探故高尚。
清泉室外淙，繁瀾壁中漾。
徘徊坐石側，殷勤發幽唱。
白雲忽若飛，青巒益脩亢。
何能棄塵氣，卜築西巖上。

石上小酌

汎流歷層巒，攀蘿下迴磴。
雖有芳草心，未博遠遊興。
沉瀆愕中流，截葉怛旋徑。
酌酒坐石上，夕陽更輝映。
薄言呼兩君，音響動相應。
始信空谷巖，果叶靜者聽。
酒酣連袂歸，悠悠心靡定。

游西喜明叔孟獨二君子過訪

我本支謾人，嘯歌游西山。
心喜談道術，性憎傍塵俗。

二君英俊才世事豈拘束同遊終南山文采奪人目
數日返墟里此意常在腹因念蘇與黃巖臭一何屬
我有輞川吟鄙近不可讀請君勉和之永為此行馥

漆川西游別張子太微

送君漆上水忽見太微峯勝遊苟如此佳期難重逢
君今入懿厓且坐五老峯待予明日至同與玩仙蹤
發車

飭駕詣修陸乘和訪幽微匪答阮氏招將追碧山峭
積歲苦置紛芳春忽登眺志意旣參叶心賞故俱妙
雖微盤谷吟聊嗣澧陽嘯

下經臺書土地祠柱

昔同王子來坐此眺林谷今同王子來深杯坐樸敷
良覩無所乖佳興益飄翛悠悠西日沉倉翠奪人目
於土地祠迴磴望太微峯

陟巘下廻磴夕陽試拭目逖矣發幽思翩然媿巖谷
激泉暗松濤惠風襲春服因嘆支謾人世事安可瀆
上善池碑陰走筆

一登老子臺佳思忽萬里降觀上善池野坐彌可喜
同懷旣靡愆橫飛安得止東谷古仲雍太微近平子
慙慙遞璣章磊落動幽思黽勉事追逐倉皇媿迂鄙

感此冲抱清益令虛襟起旭日鳴煩禽春風發芳芷
中情何所攬遨景尚堪倚繫彼逍遙篇慙爾柱下史

寄題高德章微齋

達人志玄闇所蘊故高尚發腴見烟迹耀靈覩幽韞
徃訓從古然近思匪今諒昔遊懷德音邇會服佳量
安得坐君齋惠言削浮妄

同楊宗文張用昭南齋小酌

幾年滯憂否嘉賓事彌薄覽君芳草篇益想雲安作
旭日發青昊遊蜂拾花萼張絃動徵吟含杯總堪樂
願言盡今夕且示游西畧

遊觀川園

嘉木蔭高壠，遐賞適茲辰。
覽景意如挾，矚物思彌珍。
雨時群植茂，氣爽萬慮新。
瓜瓠溢畎畝，蘿蔓庭闈。

飯糗願豈革，伏櫪志先馴。
苟無采薪厄，尚可脩更論。
於高陵壽明叔初度。

為薦呂夫子，因之涇渭川。
中道遇來使，慇懃出素編。
久知滯王役，不謂會此廬。
晴春縣明月，惠風乘遠天。
木末雙輿至，迎我城西阡。
握手但相嗟，恐是夢寐然。
宴我旅人舍，坐我紫榆簾。
童子出名酒，飲如鯨吸川。
請君好自慰，聽予南山篇。

卷之三
長安卧病

積歲乏愉情中道值新疾省運誠有愆撫躬良未密
親友念久睽相覩肯輕畢開燕集妖冶揚絃奏瑤瑟
淑音既纖柔醇酒復洋洋中性欲蠲飲難可遽揮叱
陶生止酒篇稽康養生術徒切恤疚憂未究裁省實
天命倘不乖吾去小酉室

病起

攝生乏精理沈宴搜厚毛親交幸相慰稍稍就盤飧
少日志夷曠中歲辭帝闈自謂富筋力足以資丘園
擷英浥流瀨登巘望朝暾聿覽九嶺瑰兼躡崑崙根

渭華癸經涉草杜時拔援薄緣竟終惠邁恩往無鞬
緩步庭除下麗日照西原蟄蟲相續飛客亦造重門
嗟語雖可挹拍塞竟還吞明發具春服庶幾試匏尊
志願果不抑留滯何足言

晴

此雨已經月積陰數難悉况及仲春初沉沉若冥窟
天道黯莫曉人事邇堪栗展轉思古人憂來卧蓬華
汎隙發微暉過午見烟質喜已憂復生雲氣倘再失
神鳥不自翔陰翳遂騎逸顧帝命風伯掃蕩耀茲日

答仲木

適性卽為樂處安寧愁貧客來遺我書乃在涇水濱
再拜讀此書道意何慤慤昔為鸞與鳳今為參與辰
相思千萬端縷縷難具陳浮雲蔽白日遊子殊苦辛
道遠行不易戚惻傷我心

送承裕

雞鳴日未旦君子欲遠征徘徊執我手慷慨有餘情
逝水咽不返後會安可營行人盼前路斯湏聊逢迎
良晤旣靡易壯志當見明秋花各自好噲室誰與棟
憂來夜不寐揮去愁如橫希巖已寡和芳意安所傾
願秉清忠節與世傳令名

十四夜見月

城上流清輝照我清桂窟坐久忽思眠柰此筵前月
秋風吹我衣依依幽思發客散坐中庭彷彿見珠闕
惕然感故懷達旦意未歇蟋蟀相續鳴蒼苔白露滑
素光千里同佳人隔秦越豈無琉璃杯心腸為誰竭
初雪有懷

寒風飄雲氣雪片漸細微忽忽抵簾幕冉冉近人衣
已深博山想更念剡溪歸安得孟夫子同眺碧山磯
贈石泉中尉

我本山海人宿志愛泉石繄自逢此泉坐嘯忽日夕

清淨物不細溷蘊靈所藉發源本天潢引注故澄碧
泠泠帶紫房浩浩漱今昔靜虞苟中悵逖往益輝擇

送袁解夫還盩厔

吾愛袁解夫飄飄古狂客勁風凌千人高情協金石
雖爲羣小排豈繁丈夫厄自古浮天雲焉能蔽白日
酌酒發浩歌憑君永今夕

對山集卷之五